
ՍՈՑԻԱԼ-ԴԵՄՈԿՐԱՏՍԱԿԱՆ ԲԱՆՎՈՐԱԿԱՆ ՀԱՅ
ԿԱԶՄԱԿԵՐՊՈՒԹՅԱՆ (ՄԴԲՀԿ) ՁԵՎԱՎՈՐՄԱՆ
ՊԱՏՄՈՒԹՅՈՒՆԻՑ

ՎԱՀԱԳՆ ՀԱԿՈՒՅՑԱՆ

Հայ քաղաքական կուսակցությունների շարքում յուրահատուկ տեղ է զբաղեցնում Սոցիալ-դեմոկրատական բանվորական հայ կազմակերպությունը, որի ձևավորման պատմությանը և անդրադարձել ենք սույն հոդվածում:

Սոցիալ-դեմոկրատական բանվորական հայ կազմակերպության գաղափարական ձևավորման գործում կարևոր դեր է կատարել նախկին հնչակյան գործիչ Երվանդ Պալյանի կողմից ժննդում 1900 թ. օգոստոսից հրատարակված «Հանդես» ամսագիրը¹, որի շուրջը և համախմբվել են եվրոպական տարբեր համալսարանների՝ հիմնականում դաշնակցական ուսանողներ: Որոշ ժամանակ անց նրանք կազմել են «Հանդեսի» խումբը: «Հանդեսի» խումբը՝ Ե. Պալյանի և Ղազար Տեր-Ղազարյանի գլխավորությամբ, հրատարակել է «Հանդես» ամսագրի հինգ համար (300 էջ) և Հայ սոցիալ-դեմոկրատական կուսակցության ծրագիրը (32 էջ)²: Չնայած ծրագիրը կազմելուն և հրատարակած բրոշյուրների վրա Հայ սոցիալ-դեմոկրատական կուսակցության անվանումը դնելուն՝ «Հանդեսի» խումբը մինչև 1903 թ. սեպտեմբերի վերջը որևէ կազմակերպական նոր ձև չի ընդունել և այդ անվանումներն օգտագործել է ընդամենը նշելու համար իր դավանանքն ու ուղղությունը³:

Հիմնականում այս խմբի ընկալած մարքսիզմը, նրա մշակած ու քարոզած սկզբունքներն են որդեգրել ՄԴԲՀԿ ապագա հիմնադիրները: Քանի որ «Հանդեսի» և Հայ սոցիալ-դեմոկրատական կուսակցության ծրագրի օրինակներ չեն պահպանվել, նրանց հայացքների մասին որոշակի տեղեկություններ ենք քաղում 1903 թ. սկզբներին Ե. Պալյանի հրատարակած «Հայ սոցիալ-դեմոկրատ միությունը և իր «Պրոլետարիատ» օրգանը» բրոշյուրից, որտեղ հեղինակը ոչ Միայն քննադատում է Կովկասում 1902 թ. ամռանը Բ. Կնունյանցի, Ա. Զուրաբյանի, Ա. Երզնկյանի և ուրիշների կողմից ստեղծված Հայ սոցիալ-դեմոկրատների միության մանիֆեստը, որը հրատարակվել էր նրանց «Պրոլետարիատ» թերթում 1902 թ. հոկտեմբերին⁴, այլև դրան զուգահեռ ներկայացնում է իր խմբի հայացքներն այս կամ այն հարցի շուրջ: «Հանդեսի» խմբի նպատակն է եղել սոցիալիստական գրականության հայերեն թարգմանությունը և հայկական սոցիալիս-

¹ Ե. Պ ա լ յ ա ն. Հայ սոցիալ-դեմոկրատ միությունը և իր «Պրոլետարիատ» օրգանը, Ռուսչուր, 1903, էջ 2:

² Նույն տեղում:

³ «Բանվոր» (Ժնն), 1904, թիվ 1-2, հունվար-փետրվար, էջ 1:

⁴ Տե՛ս «Պրոլետարիատ» (Թիֆլիս), 1902, թիվ 1, հոկտեմբեր, էջ 1-4:

տական կուսակցության ստեղծումը ինչպես Կովկասում, այնպես էլ Արևմտյան Հայաստանում, Բուլղարիայում, Եգիպտոսում և Ամերիկայում⁵: Վերջին հանգամանքը հետագայում կարևոր

Դեր է խաղացել 1903 թ. սեպտեմբերի 27-ին ժնևում ստեղծված Հայ սոցիալ-դեմոկրատիա⁶ կազմակերպության կարճատև կյանքի և ՄԴԲՀԿ կողմից Ե. Պալյանի մերժվելու ու քաղաքական ասպարեզից հեռացվելու գործում:

Ե. Պալյանի նպատակը եղել է իր գլխավորությամբ համահայկական բանվորական սոցիալ-դեմոկրատական համադաշնության ստեղծումը, որի մեջ պետք է մտնեին, ինչպես արդեն ասվեց, Կովկասի, Արևմտյան Հայաստանի, Եգիպտոսի, Բուլղարիայի, Ամերիկայի հայկական սոցիալ-դեմոկրատական բանվորական կազմակերպություններ, որոնցից յուրաքանչյուրը միաժամանակ ֆեդերատիվ սկզբունքով պետք է մտնեի համապատասխան երկրի սոցիալ-դեմոկրատական կուսակցության մեջ: Այս առումով պատահական չէր Պալյանի հանդիմանությունը՝ ուղղված Հայ սոցիալ-դեմոկրատների միությանը՝ կապված նրանց ընտրած անվան հետ: Նա նշում էր, որ եթե այդ կազմակերպությունը ճանաչում է միայն կովկասյան բանվորական շարժումը, ինչու⁷ է իրեն կոչում Հայ սոցիալ-դեմոկրատների միություն և ոչ թե Կովկասյան հայ սոցիալ-դեմոկրատների միություն⁸ և առավել ևս պատահական չէր մեկ տարի հետո (1903 թ. սեպտեմբերին) Ե. Պալյանի խմբի կողմից ստեղծած «Հայ սոցիալ-դեմոկրատիա» կազմակերպության անվան ընտրությունը: Ինչ վերաբերում է կոնկրետ երկրի սոցիալ-դեմոկրատական կուսակցության կազմակերպական կառուցվածքին, ապա, ըստ նրա, օրինակ, Կովկասի դեռևս գոյություն չունեցող յուրաքանչյուր ազգային կազմակերպություն պետք է ունենար գյուղական, արվարձանային, քաղաքային, շրջանային կոմիտեներ, Կենտրոնական խորհուրդ, Վերաքննիչ մարմին, Ընդհանուր ժողով, որոնք զբաղվելու էին տեղական հարցերով, իսկ բոլոր ազգությունների ներկայացուցիչների կողմից ընտրված Ընդհանուր կենտրոնական խորհուրդը վարելու էր կուսակցության ընդհանուր և խոշոր գործերը⁹: Միաժամանակ այս հանգամանքը չպետք է խանգարեր, որ համայն Ռուսաստանի բոլոր ազգությունների պրոլետարիատը դասակարգային համերաշխությամբ կազմեր միայն մի կուսակցություն, քանի որ այդ էր, ըստ նրա, իրականության պահանջը և սոցիալիզմի սկզբունքներից մեկը⁹: Եթե առանձին պետության սոցիալ-դեմոկրատական կուսակցության կազմակերպական կառույցի սկզբունքը նրանք վերցրել էին ավստրիական մարքսիստներից, ապա համահայկական սոցիալ-դեմոկրատական կազմակերպությունների համադաշնության (կոնֆեդե-

⁵ Ե. Պ ա լ յ ա ն. նշվ. աշխ., էջ 2:

⁶ Այս կապակցությամբ դժվար է համաձայնել ակադեմիկոս Հ. Միմոնյանի այն տեսակետին, թե Հայ սոցիալ-դեմոկրատիա կազմակերպությունն առաջացել է ավելի վաղ (տե՛ս Հ. Մ ի մ ո ն յ ա ն. Ազատագրական պայքարի ուղիներում, գ. 2, Երևան, 2003, էջ 24), քանի որ Ե. Պալյանը «Բանվոր» թերթում ուղղակի նշում է, որ «Հայ սոցիալ-դեմոկրատիան» ստեղծվել է 1903 թ. սեպտեմբերի 27-ին (տե՛ս «Բանվոր», Ժնև, 1904, թիվ 1-2, էջ 1):

⁷ Ե. Պ ա լ յ ա ն. նշվ. աշխ., էջ 12-13:

⁸ Նույն տեղում, էջ 17:

⁹ Նույն տեղում, 15:

րացիա) գաղափարը նոր երևույթ էր, քանի որ, ինչպես հայտնի է, անգամ հայերի նման աշխարհասփյուռ հրեաները Ռուսական կայսրությունում իրենց սոցիալ-դեմոկրատական կուսակցությունը ստեղծելիս որոշ տարածքային սահմանափակում էին դնում՝ Ռուսաստանի, Լիտվայի և Լեհաստանի համընդհանուր հրեական բանվորական միություն: Բացի այդ, արդարացի չէ խորհրդային պատմագրության մեջ հաճախ տեղ գտած այն մեղադրանքը, թե սպեցիֆիկները (բոլշևիկները ՄԴԲՀԿ-ին և նրա գործիչներին այդպես են անվանել) կուրորեն նմանակել են Բունդին (Ռուսաստանի, Լիտվայի, Լեհաստանի համընդհանուր հրեական բանվորական միություն), որովհետև ՄԴԲՀԿ-ն իր ազգային ֆեդերատիվ կազմակերպական սկզբունքը ժառանգել էր «Հանդեսի» խմբից, իսկ վերջինս, ինչպես արդեն ասվեց, այն ոչ միայն վերցրել էր ավստրիական մարքսիստներին, այլև որոշակի նոր երանգ էր հաղորդել դրան:

«Հանդեսի» խումբը ի տարբերություն Հայ սոցիալ-դեմոկրատների միության (ՀՄԴՄ) մասնակի սոցիալական, քաղաքական ռեֆորմների, պառլամենտական պայքարի նկատմամբ մերժողական դիրքի¹⁰, սոցիալ-դեմոկրատական կուսակցության նպատակն էր համարում հարատև և սիստեմատիկ տնտեսական, քաղաքական շարունակական վերափոխումներով սոցիալիստական հասարակության նախադրյալների ստեղծումը, որը, ըստ նրանց, իրենից, անկասկած, սոցիալիստական հեղափոխություն էր ներկայացնում, քանի որ այդ ռեֆորմները իրականացվելու էին բուրժուազիայի ընդդիմությունը հաղթահարելու միջոցով: Եվ նրանք իրենց այս դիրքորոշումը հիմնավորում էին հենվելով ոչ թե Լենինի և բոլշևիկյան մամուլի, այլ II ինտերնացիոնալի Ցյուրիխի՝ 1893 թ., Լոնդոնի 1896 թ. կոնգրեսների որոշումների, ինչպես նաև Կ. Կաուցկու, Է. Բեռնշտայնի և այլոց աշխատությունների վրա¹¹:

Կովկասի վերաբերյալ Պալյանը նշում էր, որ Ռուսաստանի բոլոր ազգերի բանվորները դասակարգային համերաշխությամբ պետք է կազմեն միայն մեկ կուսակցություն¹², սակայն Կովկասի յուրաքանչյուր ազգի բանվոր դասակարգ պետք է ունենար առանձին կազմակերպություն¹³, և պետք է տարբերվեր մյուսներից լեզվային, կազմակերպչական ինքնուրույնությամբ և յուրահատուկ այլ պահանջներով: Ըստ նրա՝ մեկ միասնական սոցիալ-դեմոկրատական կուսակցություն կարող է կազմվել միայն այն դեպքում, երբ ազգությունները կստեղծեն ինքնուրույն և գիտակից միություններ և կքարոզեն ու կգործեն միասնաբար¹⁴: «Հանդեսի» խումբը մերժում էր նաև ապագա Ռուսաստանի ֆեդերատիվ կառուցվածքը՝ կարծելով, որ դա ոչ հնարավոր է, ոչ էլ անհրաժեշտ: Հնարավոր չէր, որովհետև մի կողմից ռուսական միապետությունը բիրտ ուժի միջոցով երբեք թույլ չի տա դրա ստեղծումը, մյուս կողմից էլ ազգությունները չեն կարողանա համաձայնության գալ իրենց մյուս դասակարգերի հետ: Իսկ դաշնության անհրաժեշտությունը մերժվում էր, քանզի այն «ոչ մի մագաչափ չէր կարող ա-

¹⁰ Նույն տեղում, էջ 11:

¹¹ Նույն տեղում, էջ 12:

¹² Նույն տեղում, էջ 15:

¹³ Նույն տեղում, էջ 17:

¹⁴ Նույն տեղում, էջ 19-20:

նաջ մղել պրոլետարիատի պատմական միսիան»¹⁵: Հարկ է նշել, որ նորաստեղծ ՄԴԲՀԿ իր հիմնադիր մանիֆեստում որպես Ռուսաստանի ապագա պետական կառուցվածքի ձև ընդունել է ռամկավար դաշնային հանրապետությունը, սակայն շուտով հրաժարվել է դրանից, քանի որ, ինչպես Դ. Անանունն է նշում, «ՄԴԲՀԿ հիմնադիրները մտավախ հանդիսացան ֆեդերացիայի պահանջի խնդրում... (սակայն) հրաժարվելով քաղաքական ֆեդերալիզմից ամուր ապավինեցին կազմակերպական ֆեդերալիզմին»¹⁶: Առաջ անցնելով՝ նշենք, որ 1917 թ. փետրվարյան հեղափոխությունից հետո նրանք նորից հակվում են ֆեդերատիվ սկզբունքին:

Ինչ վերաբերում է կուլտուր-ազգային ինքնավարության սկզբունքին, որը հետագայում որդեգրեցին սպեցիֆիկները, ապա այն «Հանդեսի» խմբի մոտ հստակ ձևակերպված չէ, այլ դրսևորվում է հայ սոցիալ-դեմոկրատական կազմակերպության ինքնավարության և ընդհանուր պրոլետարական պահանջների (մամուլի, խոսքի, ժողովների և այլն) իրականացման հետ, որովհետև այդ պահանջների կատարմամբ վերանալու էր նաև լեզվի, դպրոցների նկատմամբ խտրականությունը¹⁷:

Այսպիսով, վերը նշվածից կարելի է եզրակացնել, որ սպեցիֆիկների մի շարք մտեցումների ընտրության հարցում էական է եղել «Հանդեսի» խմբի գաղափարական ազդեցությունը, իսկ թե ինչպես են նրանց տեսակետները տարածվել Անդրկովկասում և, մասնավորապես, Բաքվում ու ինչպես է այնտեղ ձևավորվել Սոցիալ-դեմոկրատական բանվորական հայ կազմակերպությունը, մենք կարող ենք պատկերացում կազմել՝ ծանոթանալով տեղի դաշնակցական կազմակերպությունների գործունեության և ներկուսակցական մթնոլորտի հետ:

Դաշնակցական և հետագայում Դաշնակցությունից հեռացած մի քանի հայտնի գործիչներ իրենց հուշերում նշում են, որ 1899–1902 թվականներին Դաշնակցության ներսում խոսակցություններ են եղել կուսակցության կովկասյան գործունեության անհրաժեշտության մասին¹⁸: Օրինակ՝ Արամայիսը (Միսաք Տեր-Դանիելյանը) Դ. Անանունի մասին գրած իր հուշերում նշում է, որ 1899 թ., Անանունի դաշնակցական եղած ժամանակ, երբ իրենք աշխատելիս են եղել Բաքվի նավթարդյունաբերական տարբեր ընկերությունների գրասենյակներում, միասին գաղտնի հրատարակել են «Բանվոր» անունով ձեռագիր երկշաբաթաթերթի մի քանի համար¹⁹, իսկ Արսեն Ամիրյանը (Մրավյան) գրել է, որ 1901 թ. մի քանի ընդդիմադիր դաշնակցականներ Բաքվում հրատարակել են մի թոռուցիկ, որտեղ շեշտված է եղել «կովկասյան գործունեության անհրաժեշտությունը»²⁰:

Դաշնակցության մեջ այս միտման առաջացումը պայմանավորված էր մի կողմից նրանով, որ դաշնակցական մի շարք երիտասարդներ բավարարված

¹⁵ Նույն տեղում, էջ 26-27:

¹⁶ Դ. Ա ն ա ն ու ն. Ռուսահայերի հասարակական զարգացումը, հ. 3, Վենետիկ, 1926, էջ 96-97:

¹⁷ Ե. Պ ա լ յ ա ն. նշվ. աշխ., էջ 27-28:

¹⁸ Տե՛ս «Հայրենիք» (Բոսթոն), 1925, թիվ 4(28), էջ 106, 1939, թիվ 1 (205), 69 «Վեմ» (Փարիզ), 1933, Ա., սեպտեմբեր-հոկտեմբեր, էջ 102:

¹⁹ Հայաստանի ազգային արխիվ (ՀԱԱ), ֆ. 150, ց. 1, գ. 25, էջ 59:

²⁰ «Վեմ», 1933, Ա., սեպտեմբեր-հոկտեմբեր, էջ 102:

չէին Արևմտահայ դատի համար տարվող աշխատանքներով²¹, իսկ մյուս կողմից՝ նրանց վրա ազդում էր «ընկերվարական վարդապետության Անդրկովկաս մուտք գործելը և բանվորական կենտրոններում նվաճումներ անելը»²²:

Եվ տրամաբանական է, որ հայերեն սոցիալիստական գրականությունն ձեռք բերելու համար նրանք դիմած լինեին «Հանդեսի» խմբի իրենց եղբայրներին, համերկրացիներին ու կուսակիցներին: Ինչ վերաբերում է ՄԴԲՀԿ ապագա հիմնադիրներին, ապա նրանք մարքսիզմով հետաքրքրվելու համար ունեցել են նաև այլ դրդապատճառ: Բանն այն է, որ XIX դարի վերջին և XX դարի սկզբին մի շարք պայմանների բերումով հայ երեխաների զգալի մասը հաճախում էր ռուսական պետական դպրոցներ, և այս հանգամանքը նպաստում էր նրանց գիտակցության ապահայկականացմանը, ռուսականացմանը. այդպիսով՝ հայ երեխաները, փաստորեն, կտրվում էին հայ կյանքից և վերածվում էին ռուսական մտածելակերպով քաղաքացիների: Այդ վտանգի դեմն առնելու, նրանց հայկական միջավայրի հետ կապելու, հայության խնդիրներին ծանոթացնելու համար ՀՅԴ Բաքվի կազմակերպությունը սկսում է բացատրական աշխատանքներ տանել աշակերտների հետ: Աբրահամ Գյուլխանդանյանը այդ կապակցությամբ իր հուշերում գրել է, որ աշակերտությունը հետաքրքրվել է ՀՅԴ և Հնչակի միջև առկա տարբերություններով, բայց նրանց ավելի զբաղեցրել են սոցիալ-դեմոկրատները, մինչդեռ իրենք այդ ուղղությամբ հարմար գրականություն չեն ունեցել²³:

Այսպիսով, ՀՅԴ Բաքվի կազմակերպությունն աշակերտների հետ տարվող աշխատանքներն ավելի արդյունավետ դարձնելու համար 1902 թ. վերջին – 1903 թ. սկզբին որոշում է հրավիրել Բաքվի դպրոցների աշակերտական համագումար, որին հրավիրում է նաև տեղի բոլոր կուսակցությունների ներկայացուցիչներին, որոնք ևս պետք է պարզաբանեին իրենց կուսակցական տեսակետները: Հետաքրքիր է, որ ՀՅԴ կողմից այդ ժողովներին մշտապես մասնակցել են Հ. Շահրիկյանը, Ն. Տեր-Ղազարյանը, Ալ. Ծատուրյանը (Ռուբենի) և Աբ. Գյուլխանդանյանը²⁴: Ահա վերը նշվածից պարզվում է՝ աշակերտների հետ տարվող աշխատանքներին ակտիվորեն մասնակցող ապագա ՄԴԲՀԿ հիմնադիրներից Ն. Տեր-Ղազարյանը և Ալ. Ռուբենին աշակերտների հետաքրքրությունը բավարարելու, աշակերտական համագումարներում այլ կուսակցությունների ներկայացուցիչների հետ բանակոխվելու պատշաճ ներկայանալու և Դաշնակցության շահերը պաշտպանելու համար մարքսիստական գրականության կարիք են ունեցել: Ճիշտ է, հրապարակի վրա եղել է մարքսիստական որոշ ռուսերեն գրականություն, սակայն զուտ ռուսական ուղղվածություն ունեցող այդ գրականությունը, ըստ երևույթին, չի բավարարել նրանց պահանջմունքները, և նրանք դիմել են «Հանդեսի» խմբին, մանավանդ որ՝ Ղ. Տեր-Ղազարյանը և Ն. Տեր-Ղազարյանը եղբայրներ էին, ու բացի այդ՝ նրանք բոլորն էլ շուշեցիներ կամ Շուշիի դպրոցի սաներ ու դաշնակցականներ էին: Մենք ուղղակի փաստեր չունենք, որոնցով հնարավոր լիներ ապացուցելու մարքսիստական գրականության մատակա-

²¹ «Հայրենիք», 1925, թիվ 4 (28), փետրվար, էջ 106:

²² «Հայրենիք», 1939, թիվ 1 (205), նոյեմբեր, էջ 67:

²³ «Հայրենիք», 1924, թիվ 8, հունիս, էջ 115:

²⁴ Նույն տեղում:

րարման հարցը: Մակայն այն հանգամանքը, որ հետագայում նրանց հայացքները գլխավորապես համընկել են, և նրանք միավորվել են ՄԴԲՀԿ մեջ, վկայում է այն մասին, որ այդպիսի կապ եղել է: Ուշագրավ է նաև այն, որ Ն. Տեր-Ղազարյանը և Ալ. Ռուբենին, շատ սիրված լինելով դաշնակցական երիտասարդների ու աշակերտների կողմից, հետո էլ (ՄԴԲՀԿ ժամանակ) պահպանել են այդ ազդեցությունը²⁵:

Այսպիսով, ինչպես Դաշնակցության Բաքվի կազմակերպության մեջ տիրող ընդհանուր մթնոլորտը, այնպես էլ առանձին երիտասարդ դաշնակցականների գործունեության ուղղությունը նպաստել են, որ նրանք ուսումնասիրեն մարքսիզմը, հետաքրքրվեն սոցիալ-դեմոկրատական շարժմամբ: Արդյունքում որոշ ժամանակ անց ստեղծվել է մի իրավիճակ, երբ նրանք այնքան են կլանվել մարքսիզմով, որ դարձել են մարքսիստական աշխարհայացքով դաշնակցականներ, և անհրաժեշտ էին որոշ ազդակներ, նպաստավոր պայմաններ, որպեսզի նրանք հեռանային Դաշնակցությունից և նվիրվեին սոցիալ-դեմոկրատական, մարքսիստական սկզբունքներով կազմակերպելու հայ բանվորությանը և նրա քաղաքական պայքարը ղեկավարելու գործին:

Այդպիսի ներքին ու արտաքին պայմաններ ստեղծվում են 1903 թ.: Այս առումով ներքին ազդակի դեր կատարեցին Դաշնակցության ներսում տեղի ունեցած իրադարձությունները. մասնավորապես, 1903 թ. սկզբից ժննում «Հանդեսի» շուրջ համախմբված դաշնակցական երիտասարդների ու տեղի ՀՅԴ ղեկավարության միջև տարաձայնություններն ակնհայտ սուր բնույթ են ստանում, և առաջինները այդ մասին մասնավոր նամակներով հայտնում են տարբեր անձանց: Սկզբում Կովկասում դրան բավականին հանգիստ են վերաբերվում՝ կարծելով, որ Քիրստափոր Միքայելյանը, որը պետք է մեկներ ժնն, կհարթի այդ «թյուրիմացությունները», սակայն վերջինս չի կարողանում դարձի բերել չափից դուրս ապագայնացած երիտասարդներին, գործին չի օգնում նաև Աբ. Գյուլիսանդանյանի և Ն. Տեր-Ղազարյանի երկարաշունչ նամակը՝ ուղղված Ղ. Տեր-Ղազարյանին²⁶: Արդյունքում՝ 1903 թ. սեպտեմբերի 27-ին ժննում կայացած նիստում նրանք Ե. Պայյանի հետ ստեղծում են «Հայ սոցիալ-դեմոկրատիա» խումբը²⁷, որը, սակայն, երկար կյանք չի ունենում:

Հայ կազմակերպության առաջացմանը նպաստած ներքին մյուս ազդակը Դաշնակցության կողմից կովկասյան և հատկապես բանվորական շարժումներին մասնակցելու առաջարկի մերժումն էր:

²⁵ «Վես», 1933, Ա., սեպտեմբեր-հոկտեմբեր, էջ 103, «Ձայն» (Թիֆլիս), 1906, թիվ 6, նոյեմբերի 5, էջ 92, Ս. Կ ա ս յ ա ն. Սպեցիֆիկները և սպեցիֆիզմը, Թիֆլիս, 1928, էջ 40-42:

²⁶ «Հայրենիք», 1925, թիվ 4 (28), փետրվար, էջ 110:

²⁷ «Բանվոր», 1904, հունվար-փետրվար, թիվ 1-2, էջ 1:

1903 թ., ըստ երևույթին գարնանը²⁸, Բաքվում տեղի է ունենում ՀՅԴ կովկասյան մարմինների Ռայոնական ժողով, որին մասնակցում են ներկայացուցիչներ Թիֆլիսից, Շուշիից, Ալեքսանդրապոլից, Կարսից, Ռուսաստանի ուսանողությունից, ինչպես նաև Բաքվից: Վերջինիս ներկայացնում էին Հ. Շահրիկյանը, Ն. Տեր-Ղազարյանը, Աբ. Գյուլխանդանյանը և այլք: Ժողովում Ն. Տեր-Ղազարյանը և Աբ. Գյուլխանդանյանը որպես քննարկման նյութ են առաջարկում «ՀՅԴ դիրքը բանվորական շրջաններում տեղի ունեցող գործադուլների ժամանակ» թեման, ինչը տաք վիճաբանությունների տեղիք է տալիս: Հատկապես խիստ է արտահայտվում բժիշկ Մանուելյանը՝ հայտարարելով, որ Կովկասյան գործերով, մանավանդ բանվորական խնդրով զբաղվելը ՀՅԴ գործը չէ, որ դրա համար գոյություն ունի սոցիալ-դեմոկրատական կուսակցություն: Ըստ նրա՝ «ՀՅԴ աշխատանքը Տաճկահայաստանում ազգային տենչանքները իրականացնելն է»²⁹:

Հետևանքը լինում է այն, որ ընդունվում է հետևյալ որոշումը. «ՀՅԴ ժողովը ընդունելով, որ բանվորական շարժումը կենսունակ և խոշոր երևույթ է, բայց գտնում է, որ ՀՅԴ չի կրնա ակտիվ մասնակցություն ունենալ, համակրելով հանդերձ, քանի ազգային դատը ավելի տազնապալի է, և մեր ուժերը երկու գործի համար անբավարար»³⁰: Ըստ Վ. Մինախոբյանի՝ 1903 թ. մտավորականների մի խմբի կողմից ՀՅԴ-ին առաջարկվեց մասնակցել Ռուսաստանի ազատագրական կովին, բայց մերժվելով՝ այդ խումբն անջատվեց և 1903 թ. հոկտեմբերին հիմնեց Սոցիալ-դեմոկրատական բանվորական հայ կազմակերպությունը³¹:

Խմբի անջատման և ՄԴԲՀԿ ստեղծման համար արտաքին խթանի դեր են կատարել՝ առաջին՝ 1903 թ. և հատկապես ամռանը բանվորական շարժումների աննախադեպ ակտիվացումը, երկրորդ՝ երիտասարդ դաշնակցականների՝ Ռուսաստանի սոցիալ-դեմոկրատների հետ բանավեճերում մրցունակ լինելու մեծ ձգտումը (այդ շրջանում բոլոր սոցիալ-դեմոկրատները տառապում էին իրենց առավել ուղղափառ մարքսիստ ներկայացնելու մոլուցքով: Եվ այս պայմաններում հեշտ չէր արդեն ձևավորված դաշնակցական-մարքսիստ երիտասարդների համար մնալ ազգայնական, բուրժուական որակվող Դաշնակցության մեջ)³²:

Այստեղ հարկ ենք համարում անդրադառնալ ՄԴԲՀԿ ստեղծման «հրեական վարկածին»՝ որպես արտաքին ազդակի: Խորհրդային պատմագրության և նրանց հարող հրապարակախոսության մեջ տարածում է գտել այն տեսակետը,

²⁸ Ըստ Հ. Տասնապետյանի՝ այդ ժողովը տեղի է ունեցել 1903 թ. հունիսի 12-ից որոշ ժամանակ առաջ [տե՛ս Հ. Տ ա ս ն ա պ ե տ յ ա ն. ՀՅԴ կազմութենեն մինչև Ժ Ընդ. ժողովը (1890-1924), Աթենք, 1988, էջ 64], իսկ Աբ. Գյուլխանդանյանը նշում է, որ ժողովը տեղի է ունեցել 1903 թ. 2-րդ կեսին, սակայն նա, բացի բանվորական շարժումների մասնակցելու հարցից, ուրիշ հարց չի հիշում, որ քննարկված լինելը [տե՛ս «Հայրենիք», 1925, № 4 (28), էջ 107]: Այս հանգամանքը կասկած է հարուցում, քանի որ դժվար թե հունիսի 12-ի օրենքից հետո գումարվեր ՀՅԴ Կովկասյան մարմինների Ռայոնական ժողով և եկեղեցական գույքի բռնագրավման հարցը առաջնային պլանում չլինելը ու նրա մեջ չտպավորվելը:

²⁹ «Հայրենիք», 1925, թիվ 4(28), էջ 17:

³⁰ Հ. Տ ա ս ն ա պ ե տ յ ա ն. նշվ. աշխ., էջ 64:

³¹ Վ. Մ ի ն ա խ ո բ յ ա ն. Անջատականներ. «Վեկ», 1933, էջ 103:

³² Այս մասին տե՛ս «Հայրենիք», 1922, թիվ 1, էջ 56, 1925, թիվ 4 (28), էջ 110:

թե ՄԴԲՀԿ-ն արհեստականորեն ստեղծվել է Բունդի կողմից ՌՄԴԲԿ 2-րդ համաժողովից հետո և ի հակադրություն նրա՝ Կովկասում իր սկզբունքներն արմատավորելու նկատառումով: Այս վարկածը առաջ քաշելու համար հիմք է ծառայել բոլշևիկների առաջնորդ Վ. Լենինի՝ 1905 թ. սեպտեմբերի 5-ին ՌՄԴԲԿ - կենտրոնին ուղարկված նամակում սպեցիֆիկների մասին արտահայտած այն կարծիքը, թե «դա բունդական կրեատուրա (դրածո – Վ. Ն.) է, ուրիշ ոչինչ, որը հատկապես հորինված է կովկասյան բունդիզմը սնելու համար»³³: Տրամաբանական է, որ խորհրդային շրջանի ոչ մի պատմաբան չի համարձակվել շրջանցել կամ գոնե քննել այդ գնահատականը: Առկա գրեթե բոլոր ուսումնասիրություններում, որտեղ քիչ թե շատ անդրադարձ կա սպեցիֆիկների մասին, Լենինի խոսքերը կամ բառացի մեջբերված են, կամ զարգացված: Մակայն միայն խորհրդային պատմագրությունը չէ, որ անդրադարձել է այս հարցին: 1950-ական թվականների 2-րդ կեսին, երբ Սփյուռքում քննարկման առարկա է եղել Հնչակյան կուսակցության 70-ամյակի կապակցությամբ գրվելիք նրա պատմության ուղղվածության հարցը, ոմն Ս. Լորելյըր ռամկավարների օրգան «Արև» թերթում հանդես է եկել «Պատմագիտական դիտողություններ Հնչակյան պատմագրության առթիվ» վերտառությամբ հոդվածով՝ ուղղված Ա. Կիտուրի դեմ, որտեղ ինչ-ինչ հարցերին զուգահեռ, ՄԴԲՀԿ մասին նշել է հետևյալը. «Հայկական Բունդը» կամ «Սպեցիֆիկներ»-ի անդամները պոկվել են Դաշնակցության բղկոցից 1905 թ.: Նրանց կենտրոնական ամսաթերթ «Սոցիալիստը» 1905 թ. Ժնևում հրեական բունդի կնքահայրությամբ է ծնված: Սպեցիֆիկների կազմակերպությունը արհեստականորեն ստեղծել էին հրեական Բունդի կենտրոնի ղեկավարները Ժնևում՝ Ա. Կրամերը և Վ. Մեդեմը, որոնց նյութական միջոցներով և գաղափարական փշրանքներով էլ կերակրվում էին «Սոցիալիստը», «Նոր կյանքը»: Նրանք (Կրամերը և Մեդեմը – Վ. Ն.) այդպիսով վրեժ էին լուծում համառուսական ՄԴԲԿ-ից, որը մերժել էր ճանաչել հրեական Բունդը»³⁴: Մենք չկարողացանք պարզել հեղինակի ով լինելը և օգտագործած սկզբնաղբյուրները, սակայն մեզ համար ակնհայտ է խորհրդային իշխանությունների առաջ հոդվածագրի հաճոյանալու ու այդ ճանապարհին մի շարք փաստեր աղավաղելու, սխալ ներկայացնելու միտումը: Իրականությունն այն է, որ թե՛ ՄԴԲՀԿ, թե՛ նրա օրգան «Սոցիալիստը» հիմնվել են ոչ 1905 թ. և ոչ էլ Ժնևում, այլ Բաքվում. կազմակերպությունը՝ 1903 թ. հոկտեմբերին, «Սոցիալիստը»՝ 1904 թ. մայիսի սկզբին: Այս փաստական սխալները, տեղեկատվության սկզբնաղբյուրներ չնշելը, հոդվածագրի սպեցիֆիկներին վիրավորելու, ստորացնելու ակնհայտ միտումը, մեզ հիմք են տալիս չվստահել հոդվածագրին և չօգտագործել այդ տեղեկատվությունը:

Ամբողջացնելով Բունդի կողմից ՄԴԲՀԿ ստեղծման և ֆինանսավորման գոյությունն ունեցող վարկածի մասին տեղեկատվությունը, որի միակ աղբյուրը, ըստ երևույթին, Վ. Լենինի գնահատականն է՝ կարելի է հանգել հետևյալ եզրակացություններին.

³³ Վ. Բ. Լ. և ի ն. Երկերի լիակատար ժողովածու, հ. 47, Երևան, 1983, էջ 79-80:

³⁴ Մաշտոցի անվան Մատենադարան, Արշակ Ալպոյաճյանի արխիվ, թղթ. 3, վավ. 6/16, թ. 2:

ա) անկասկած *Բունդը միակ կուսակցությունն է եղել, որի հետ ՄԴԲՀԿ-ն ունեցել է բավականին ջերմ հարաբերություններ, և նրանք միշտ աջակցել են իրար:*

բ) Չնայած ուղղակի փաստեր չկան, բայց չի բացառվում, որ *Բունդը կարող էր իր բարոյական, քաղաքական ազդեցությամբ արտաքին ազդակի դեր կատարել ՄԴԲՀԿ ստեղծման գործում, քանի որ փոքր-ինչ տարօրինակ է, որ 1903 թ. գարնանը սպեցիֆիկները, մերժվելով ՀՅԴ կողմից, աշնան կեսերին նոր են հեռանում Դաշնակցությունից ու բացի այդ՝ հետաքրքիր է, որ ՄԴԲՀԿ-ն ստեղծվել է ՌՄԴԲԿ 2-րդ համագումարից որոշ ժամանակ հետո, երբ համագումարում Բունդի առաջարկած կուսակցության ազգային կազմակերպական կառուցվածքը մերժվել է և այդ հարցում, որպես հակադիր փաստարկ, օգտագործվել է գլխավորապես ՌՄԴԲԿ Կովկասյան միության կազմակերպական կառուցվածքը: Այստեղ, սակայն, չի բացառվում նաև սպեցիֆիկների՝ Դաշնակցությունից անջատվելու վրա ազդված լինելը հենց ՌՄԴԲԿ ստեղծման փաստը³⁵:*

գ) Թե՛ ՄԴԲՀԿ-ից պահպանված ֆինանսական բնույթի որոշ փաստաթղթերում³⁶, թե՛ այլ նյութերում որևէ հիշատակություն չկա սպեցիֆիկների՝ Բունդից ֆինանսական որևէ օգնություն ստանալու մասին, սակայն ընդհանրապես չի կարելի ժխտել նման օգնություն ստանալու հնարավորությունը: Բայց դա կարող էր լինել շատ ավելի ուշ շրջանում, քանի որ վկայություններ կան հայ կազմակերպության գոյության վաղ շրջանում սպեցիֆիկների նյութական ծանր պայմանների մասին: Օրինակ՝ Ն. Տեր-Ղազարյանը այդ շրջանի մասին գրում է. «Գրականության կարիքը մեծ էր, միայն բերանացի պրոպագանդան ու ազիտացիան չէր կարող բավարարություն տալ, սակայն մատաղ կազմակերպությունը միջոցներ չունեի անհրաժեշտ ծախսերի համար: Այդ պատճառով բոլոր ընկերները, որոնք ծառայում էին, իրենց ստացածի մի մասը հանում էին գործն առաջ տանելու: Տպագրվում են մի շարք թռուցիկներ, լեզալ բրոշյուրներ, իսկ 1904 թ. մայիսի 1-ին լույս է տեսնում կազմակերպության օրգան «Սոցիալիստի» առաջին համարը»³⁷: Դ. Անանունը Ալ. Ռուբենու մասին իր հոդվածում նշում է. «ՄԴԲՀԿ - թույլ լինելով նյութապես չէր կարող ապահովել Ալ. Ռուբենու ապրուստի միջոցները և նրան դարձնել ըստ արհեստի մարքսիզմի քարոզիչ: Իր հանապազօրյա հացը վաստակելու համար նա ստիպված եղավ 2 տարի դառնալ «Մուրճ» ամսագրի սրբագրիչ, ապա ուսուցչության պաշտոն ստանձնել Բաքվում»³⁸: Այնուամենայնիվ, եթե անգամ սպեցիֆիկները Բունդից երբևէ նյութական օգնություն ստացած լինեին, ապա դրանում ոչ մի պարսավելի բան չկա, քանի որ երկուսն էլ Ռուսաստանի քաղաքական կազմակերպություններ էին և հետապնդում էին միևնույն նպատակները, ինչը չի կարելի ասել բոլշևիկների մասին, երբ նրանք իրենց քաղաքական նպատակներին հասնելու համար չխորշեցին նյութական

³⁵ Ճիշտ է ՌՄԴԲԿ հիմնվել է 1898 թ. մարտին, սակայն, ըստ էության, կուսակցության ստեղծումը իր երկու թևերով կարելի է համարել 1903 թ.:

³⁶ ՀԱԱ, ֆ. 1455, ց. 1, գ. 10:

³⁷ «Չայն», 1906, թիվ 4, հոկտեմբերի 22, էջ 56:

³⁸ «Հայաստանի Կոոպերացիա» (Երևան), 1920, թիվ 14, հուլիսի 31, էջ 571:

միջոցներ ստանալ Ռուսաստանի թշնամի Գերմանիայից՝ հստակ իմանալով, որ վերջինիս նպատակն ամենևին Ռուսաստանին օգնելը չէր:

դ) Եվ, վերջապես, անընդունելի պետք է համարել խորհրդային պատմագրության մեջ քաղաքական նկատառումներով առաջ քաշված այն տեսակետը, թե ՄԴԲՀԿ արհեստականորեն Բուհի կողմից ներդրվել է Կովկասի քաղաքական դաշտում³⁹: Մինչդեռ ներկայացված տվյալները և փաստարկները ցույց են տալիս, որ Հայ կազմակերպությունը ի հայտ է եկել օրինաչափ զարգացող գործընթացների արդյունքում:

Այսպիսով, վերը ներկայացված ներքին և արտաքին պայմանների համընկման արդյունքում 1903 թ. հոկտեմբերին Բաքվում հիմնականում Դաշնակցությունից հեռացած երիտասարդ մտավորականների մի խումբ հրատարակում է իր մանիֆեստը և դրանով իսկ ազդարարում «Սոցիալ-դեմոկրատական բանվորական հայ կազմակերպության» ստեղծումը⁴⁰:

ՄԴԲՀԿ մանիֆեստում, որի գլխավոր հեղինակը, հավանաբար, Ալ. Ռուբենին է եղել, ասված էր. «Կազմակերպել հայ բանվորներին Կովկասում, ճանաչել նրանց կարիքները, տալ նրանց... այդ կարիքներին համապատասխան պահանջներ և ցույց տալ այն ուղին, որը հայ պրոլետարիատը պիտի անցնի, որպեսզի կարողանա իրագործել իր այդ պահանջները... լսելի անել հայ բանվոր դասակարգի կարիքները հարևան ժողովուրդների պրոլետարական կազմակերպություններին և ... ամբողջ Ռուսաստանի կազմակերպված պրոլետարիատի գործունեության շրջանակի մեջ մտցնել պահանջներ, որոնք կենսական են հայ պրոլետարիատի համար... կազմակերպվելով և ճանաչելով ինքն իրեն, այսինքն՝ իր կարիքները ու պահանջները և հարելով միջազգային այս մեծ բանակին՝ հայ պրոլետարիատն էլ կդառնա ... պրոլետարական բազմանդամ ընտանիքի հարազատ մի զավակը»⁴¹: Բացառությամբ երկու հարցի, ՄԴԲՀԿ մանիֆեստը հիմնականում պահպանել է «Հանդեսի» խմբի գաղափարական ժառանգությունը: Դրանցից առաջինը նշումն է առ այն, որ կազմակերպության գործունեության դաշտը Կովկասն է, այսինքն՝ նրանք հրաժարվում են ողջ աշխարհի հայ պրոլետարիատին կազմակերպելու և նրա պայքարը ղեկավարելու պայյանական գաղափարից, և երկրորդը՝ Հայ կազմակերպությունը ապագա Ռուսաստանը տեսնում է բաժանված շրջանների և կանտոնների, իսկ Անդրկովկասը՝ որպես ինքնավար կանտոն⁴²: Սա ևս հակասում էր «Հանդեսի» խմբի առաջարկած Ռուսաստանի ունիտար պետական կառուցվածքի սկզբունքին, սակայն, հետագայում իրենց ծրագրում սպեցիֆիկները այս սկզբունքից հրաժարվում են՝ այն համարելով ՌՄԴԲԿ հետ միավորվելու ճանապարհին լուրջ խոչընդոտ⁴³:

³⁹ Վ. Ա վ է տ ի ս յ ա ն. Հայ հասարակական-քաղաքական մտքի զարգացման Մարքսլենինյան փուլի սկզբնավորումը, Երևան, 1976, էջ 488, 506, Ծ. Ա դ ա յ ա ն. Հայ ժողովրդի ազատագրական պայքարի պատմությունից, Երևան, 1976, էջ 231, Խ. Բ ա ր ս է դ յ ա ն. Մարքսիզմի տարածումը Հայաստանում, գ. 1, Երևան, 1967, էջ 362 և այլն:

⁴⁰ Դ. Ա ն ա ն ու ն. նշվ. աշխ., էջ 93:

⁴¹ ՀԱԱ, ֆ. 1455, ց. 1, գ. 44, էջ 3-4:

⁴² Երևան տեղում, էջ 4:

⁴³ Դ. Ա ն ա ն ու ն. նշվ. աշխ., էջ 95-97:

Հայ կազմակերպության ստեղծման տեղի և ժամանակի (տարի, ամիս) վերաբերյալ հայ պատմագրության մեջ արտահայտված կարծիքները հիմնականում ընդունելի են⁴⁴, սակայն կան նաև այնպիսիք, որոնք չեն համապատասխանում իրականությանը⁴⁵: Բանն այն է, որ այդ հեղինակները շփոթել են «Հայ սոցիալ-դեմոկրատիա» խմբի ստեղծումը (Ժնն, 1903 թ., սեպտեմբեր) ՄԴԲՀԿ ստեղծման փաստի հետ (Բաքու, 1903 թ., հոկտեմբեր): Ճիշտ է, ՀՄԴ խումբը երկար կյանք չի ունեցել և կարճ ժամանակ անց նրա գրեթե բոլոր անդամները ընդգրկվել են ՄԴԲՀԿ կազմում, սակայն դա չի նշանակում, որ Սոցիալ-դեմոկրատական բանվորական հայ կազմակերպությունն առաջացել է Ժննում 1903 թ. սեպտեմբեր կամ հոկտեմբեր ամիսներին: Առավել ևս անընդունելի են այն տեսակետները, թե Հայ կազմակերպությունը ստեղծվել է 1904 կամ 1905 թվականներին⁴⁶:

ՄԴԲՀԿ հիմնադիրները և որոշ ժամանակ անց նրանց միացած անդամներն էին Ալ. Ծատուրյանը, Ն. և Ղ. Տեր-Ղազարյանները, բժ. Տ. Բասխանյանը, Մ. Բադ-դասարյանը, Ռ. Բադդասարյանը, քիմիկոս Հովհ. Յուզբաշյանը, Բ. Իշխանյանը, Հ. և Ա. Հովհաննիսյանները, Գ. Պիճիկյանը, Գ. Կոզիկյանը (Եսալեմը), Ե. Պայյան-Նը (Վ.Վահունին), Դ. Անանունը (1905 թ-ից): Ըստ հնչակյան գործիչ Ռուբեն Խան-Ազատի հուշերի՝ նրանց միացել է նաև Հնչակյան կուսակցությունից հեռացած մի փոքր խումբ⁴⁷:

Ինչ վերաբերում է «Հանդեսի» գաղափարախոս, ՀՄԴ ղեկավար Ե. Պայյանին, որը սկզբում, ըստ երևույթին, կարևոր դեր էր կատարել ՄԴԲՀԿ հիմնադրման գործում, ապա նա շուտով մեկուսացվել է կազմակերպությունից: 1904 թ. սկզբին Ժննում Գ. Կոզիկյանի (նա ևս շուտով հեռանում է Պայյանից) հետ ձեռնարկել է ՀՄԴ օրգան «Բանվոր» անունով հանդեսի հրատարակությունը, որից, սակայն, լույս է տեսել երկու համար: Նույն տարվա ամռանն ու աշնանը, լինելով Բաթու-

⁴⁴ Մ. Կ ա ս յ ա ն. Սպեցիֆիկները և Սպեցիֆիկներ, Թիֆլիս, 1928, էջ 15, Վ. Ա վ ե տ ի ս յ ա ն. նվշ. աշխ., էջ 488, Ա. Տ ե ր - Մ ի ն ա ս յ ա ն. Փորձ հայկական մարքասականության նախաճյուղ «Սպեցիֆիկներ»-ի պատմության.- «Դրոշակ», ԺԷ տարի, 1986, թիվ 2, մայիսի 14, էջ 99, Ա. Հ ա կ ո բ յ ա ն. «Սպեցիֆիկներ» (1903-1918 թթ.).- ՀՀ ԳԱԱ «Լրաբեր հասարակական գիտությունների». 1997, №2, էջ 35, Հ. Մ ի մ ո ն յ ա ն. Ազատագրական պայքարի ուղիներում, գ. 2, Երևան, 2003, էջ 245, նաև հուշեր՝ Աշ. Հ ն վ հ ա ն ն ի ս յ ա ն. Երկու բնութագիր, էջ 22, Վ. Մ ի ն ա խ ո թ յ ա ն. Անջատականներ.- «Վեմ», 1933, Ա., սեպտեմբեր-հոկտեմբեր, էջ 103, ՀԱԱ, Հ. Օ հ ա ն յ ա ն. ՄԴԲՀԿ (անտիպ հոդված) էջ 2 և այլն:

⁴⁵ Խ. Բ ա ր ս ե ղ յ ա ն. Մարքսիզմի տարածումը Հայաստանում, գ. 1, էջ 358, գ. 2, Երևան, 1975, էջ 556, Հ. Վ ա ր դ ա ն յ ա ն. Անդրկովկասում նացիոնալիզմի դեմ մղած պայքարի պատմությունից, Երևան, 1962, էջ 7, ն ու յ ն ի՝ Հայ բուրժուազայական կուսակցությունների դիրքավորումը ռուսական առաջին հեղափոխության տարիներին (1905-1907 թթ.), Երևան, 1975, էջ 160, Ա. Հ ա մ ր ա յ ա ն. Հայ հասարակական-քաղաքական միտքը արևմտահայության ազատագրության ուղիների մասին, 19-րդ դարի վերջին - 20-րդ դարի սկզբին, Երևան, 1990, էջ 248, Հայ ժողովրդի պատմություն, հ. 6, Երևան, 1981, էջ 364, Հայկական սովետական հանրագիտարան, հ. 11, Երևան, 1985, էջ 27, Հայկական հարց, հանրագիտարան, Երևան, 1996, էջ 417:

⁴⁶ Программы политических партий в России. М., 1917, с. 22 (այստեղ, թերևս, օգտվել են Դ. Անանունի թույլ տված սխալից. տե՛ս А н а н у н. Армянский вопрос в России.- В кн.: Сборник армянской литературы, под. ред. М. Горького. Пг., 1916, с. 37), Մաշտոցի անվան Մատենադարան, Արշակ Ալպոյաճյանի արխիվ, թղթ. 3, վավ. 6/16, թ. 2:

⁴⁷ Ռ. Խ ա ն - Ա զ ա տ. Հայ հեղափոխականի հուշերից.- «Հայրենիք», 1929, № 6, էջ 109):

մում, Ախալցխայում, Բաքվում և ընդհարվելով ՄԴԲՀԿ միջուկի հետ, Ե. Պայանը վերջնականապես հեռանում է կազմակերպությունից⁴⁸: Նրա հեռացման պատճառների մասին, թերևս, միայն գրել է ակադեմիկոս Հ. Միմոնյանը, որի կարծիքով Ե. Պայանը կազմակերպությունից հեռացվել է, քանի որ պնդել է, թե «Նոր կազմակերպությունը պետք է լիովին ընդունի միջազգայնականության (ինտերնացիոնալիզմի) սկզբունքը և բացառապես առաջնորդվի գիտական սոցիալիզմի՝ մարքսիզմի ուսմունքով»⁴⁹, ի հակադրություն մյուսների այն կարծիքի, որ այդ ուսմունքը պետք է հարմարեցվի հայկական կյանքի իրավիճակին⁵⁰: Մեր կարծիքով, Ե. Պայանի մեկուսացման, ապա հեռացման գլխավոր պատճառը նրա՝ ղեկավարի, ուղղորդողի դեր ստանձնելու ցանկությունն էր, ինչը չի ընդունվել ՄԴԲՀԿ կողմից: Բանն այն է, որ Ե. Պայանը թե՛ «Հայ սոցիալ-դեմոկրատական միությունը» և իր «Պրոլետարիատ» օրգանը բրոշյուրում և թե՛ «Բանվոր»-ի երկու համարներում անփոփոխ զարգացրել է տարբեր երկրների հայկական սոցիալ-դեմոկրատական կազմակերպությունների կոնֆեդերացիա ստեղծելու գաղափարը, որը պետք է ղեկավարվեր իր հիմնած «Հայ սոցիալ-դեմոկրատիա» կազմակերպության (Ժնն) կողմից, և այս առումով ՄԴԲՀԿ հիմնումը նա ընկալում էր որպես իր ծրագրի իրականացման առաջին քայլ: Բայց նրա հաշվարկները չեն արդարանում, քանի որ Հայ կազմակերպության ղեկավար կորիզը ամենևին էլ չի կիսում Ժննից ուղղորդվելու Պայանի ցանկությունը: Բացի այդ՝ նրանք իրենց գործունեության գլխավոր դաշտը համարում էին Կովկասը՝ միաժամանակ չբացառելով այլ երկրների հայ սոցիալ-դեմոկրատների հետ ջերմ հարաբերությունների հաստատումը, ինչը և արեցին հետագա տարիներին: Այս տեսակետի օգտին է խոսում նաև Ֆիլիպեի խմբի 1904 թ. մայիսի 2 (15)-ին Եվրոպայի հայ սոցիալ-դեմոկրատական կոմիտեին ուղարկված նամակում նշված այն տեսակետը, թե Ե. Պայանը հեռացել է «էգոիզմի և իշխելու ձգտումներ» արտահայտելու համար⁵¹: Այսպիսով, ՄԴԲՀԿ ղեկավարությունը, մեկուսացնելով Պայանին, իր կողմն է քաշում ՀՄԴ մյուս անդամներին, որոնք շուտով հանդես են գալիս ՄԴԲՀԿ մեջ մտնելու պաշտոնական հայտարարությամբ: Այնուհետև Ժննյան այդ խումբը Հայ կազմակերպության որոշմամբ վերաժպում է Հայ կազմակերպության արտասահմանյան կոմիտեի⁵²: Իսկ Ե. Պայանը Գ. Կոզիկյանի - հետ փորձելով շարունակել ՀՄԴ-ի կյանքը, ինչպես արդեն ասվեց, Ժննում 1904 թ. սկզբին հրատարակում է «Բանվոր» հանդեսը, բայց հաջողության չհասնելով՝ հեռանում է քաղաքական ասպարեզից:

Վերը նշված փաստական տվյալները ի մի բերելով՝ կարելի է եզրակացնել, որ ՄԴԲՀԿ ձևավորման գործընթացը սկսվել է 1900 թվականին, երբ Ժննում Ե. Պայանը սկսել է հրատարակել «Հանդես» սոցիալիստական ուղղվածության ամսագիրը և հիմնականում դաշնակցական երիտասարդների հետ կազմել է մի խումբ: «Հանդեսի» խմբի հրատարակությունները, նրանց ընկալած մարքսիզմը

⁴⁸ Հ ԱԱ, ֆ. 4004, ց. 3, գ. 11, մաս I, թ. 90:

⁴⁹ Հ. Մ ի մ ն ն յ ա ն. նշվ. աշխ., էջ 245:

⁵⁰ Նույն տեղում:

⁵¹ ՀԱԱ, ֆ. 1455, ց. 1, գ. 5, էջ 1:

⁵² Հ. Մ ի մ ն ն յ ա ն. նշվ. աշխ., էջ 245:

առանցքային դեր են կատարել ՄԴԲՀԿ ապագա հիմնադիրների գաղափարական ձևավորման գործում: Այս առումով պատահական չէ, որ Հայ կազմակերպության ծրագիրը, կանոնադրությունը, կազմակերպչական կառուցվածքի սկզբունքները վերցված են Գերմանիայի ու Ավստրո-Հունգարիայի սոցիալ-դեմոկրատական կազմակերպություններից: Այսինքն՝ նրանք մարքսիզմին, սոցիալ-դեմոկրատիային ծանոթացել են հենց դրանց ծննդավայրում՝ Արևմտյան Եվրոպայում՝ ի տարբերություն հայ բոլշևիկների, որոնք գլխավորապես ազդվել էին Ռուսաստանի մարքսիստներից, սոցիալ-դեմոկրատիայից:

Հետագայում ՄԴԲՀԿ-ն հիմնադրած երիտասարդ դաշնակցականների մարքսիզմով, սոցիալ-դեմոկրատական շարժմամբ հետաքրքրվելու համար հիմք են ծառայել արևմտահայության ազատագրական շարժումների անհաջող ընթացքը, Անդրկովկասում և մասնավորապես Բաքվում XX դարի սկզբին նկատվող բանվորական շարժումների ակտիվացումը, ՀՅ Դաշնակցության մերժողական դիրքը այդ շարժումներին մասնակցելու հարցում, ինչպես նաև որպես դաշնակցականներ նրանց մասնավոր գործունեությունը, հատկապես Բաքվի հայ աշակերտների հետ տարվող աշխատանքները: Հիմնականում վերը նշված պայմանների համադրության, համընկնման արդյունքում է 1903 թ. հոկտեմբերին Բաքվում հիմնադրվում Սոցիալ-դեմոկրատական բանվորական հայ կազմակերպությունը, որի ծննդականը նրա ընդունած մանիֆեստն էր: Դրանում նորաստեղծ կազմակերպությունը իր գլխավոր խնդիրն էր համարում Կովկասի հայ բանվորության կազմակերպումը, նրա տնտեսական ու քաղաքական պայքարի վարումը:

ИЗ ИСТОРИИ ФОРМИРОВАНИЯ АРМЯНСКОЙ СОЦИАЛ-ДЕМОКРАТИЧЕСКОЙ РАБОЧЕЙ ОРГАНИЗАЦИИ (АСДРО)

ՎԱԱԳՆ ԱԿՕՍՅԱՆ

Р е з ю м е

Среди армянских политических партий особое место занимает Армянская социал-демократическая рабочая организация (АСДРО). АСДРО, созданная в октябре 1903 г. в Баку, была марксистской социал-демократической рабочей организацией. Идеологически и организационно в ее образовании значительную роль играл Ерванд Палян, на формирование взглядов которого имела большое влияние европейская социал-демократия, в особенности германская и австрийская, и это обстоятельство в дальнейшем играло определяющую роль во взаимоотношениях РСДРП и АСДРО.

FROM THE HISTORY OF FORMATION OF ARMENIAN SOCIAL-DEMOCRATIC LABOUR
ORGANIZATION (ASDLO)

VAHAGN HAKOBYAN

S u m m a r y

Among the Armenian political parties Armenian social-democratic labour organization (ASDLO) takes special place. ASDLO was a Marxist, social-democratic, labour organization, founded in October 1903, in Baku. In ideological and organizational formation of that organization Yervand Palyan had significant role. His views were formed under the influence of European social-democracy, in particular German and Austrian, and this circumstance later on played the main role in relations between RSDLP and ASDLO.